

# Leta Labuina Diyon I Leli

## Baaba Houwan

Leta ya ana toleleli nige alana i lulumen, i ba ya te “Nau ekelesiya ana tohouwa.” Yaa totalisi hi gewi hi ba toleleli heiya Diyon, Sebedi natuna. I ola al, nige i papamasal henalau elal ge i patuna, i ba ya te “ya patuna i nowa Yehoba wana hilihili yovana alomwau ge natumwau eliyamiu.” Tabam yova hot etega alonau ge natunau, yaa totalisi hi gewi hi ba tabam ekelesiya etega ana ba kakanun te Diyon i ba pwatanek yova elana, ge natunau he tokelesiya baliya. Diyon leta ya i ginol ge i patuna elal, inoke i ba pagasisi-agil nunuwana paganina elana nihi nanawaa ge nihi matahikagil topankite kakakawel kaiweliya.

---

<sup>1</sup>Nau ekelesiya ana tohouwa leta ya ya leli ge ya patuna i nowa Yehoba wana hilihili yovana alomwau ge natumwau eliyamiu.<sup>a</sup> Ya nunuwana-agimiu hoti, ge nige maiseu ya i oola, yaa gamagalau gegewel bolo baaba tutunahotina hi atena hi nunuwana-agimiu al. <sup>2</sup>Ha nunuwana-agimiu kaiwena baaba tutunahotina i minaa elala ge ni mihot elala sauga gegewena.

<sup>3</sup>Ya awanun Yehoba Tamala ge Natuna Yeisu Keliso nihi muloluagila, nihi atilomwan-agila ge wali nuwa laumwal atela ni pakalaopop, kaiwena baaba tutunahotina ta abulilek-an ge ta nunuwana.

## Ta Nunuwana

<sup>4</sup>Ya yaliyaya nabi kaiwena wasa ya hago natumwau enuna baaba tutunahotina ana kamwasa elana hi nanawaa, i ola Tamala wana logugui elala.<sup>b</sup> <sup>5</sup>Inoke yova nunuwana, ya awanun elam te kila maisena ge maisena ta penunuwana-agila. He logugui toto ya baunan eliyam ya, nige logugui valuna i oola, yaa logugui toto abatelipuna elana sauga ta abulilek hi baunan elala ta hago.<sup>c</sup> <sup>6</sup>Ta nunuwana heiya Yehoba wana logugui ta henapuan ge eliyana ta nanawaa. He wana logugui, toto abatelipuna elana hi baunan ku hago, i ola hiwe: nunuwana paganina elana nuku nanawaa.

---

<sup>a</sup> 1 *Baaba Houwan* nu kite.   <sup>b</sup> 4 3Diy 3   <sup>c</sup> 5 1Diy 2:7

### **Panpankiti Tutunahotina Ta Pihikan Momol**

<sup>7</sup>Tokakawi hi gewi iyaka hi tagilan hi na panayawi labena gegewena elal. Heliya hi ba Yaisu Keliso i nem panayawi nige i tatabwa gamagal. Gamagalau lolal o heliya tokakawi ge heliya Keliso ana topihigelgel.<sup>d</sup> <sup>8</sup>Nuku matahikagimiu gamagalau o kaiweliya, inoke bahi wami tuwalali enona nuku papayaomal, yaa molamiu nuku ahe paolaolaek. <sup>9</sup>Henala ebo nige ni miminaa Keliso wana panpankiti elana, yaa ni eguluwan ni na panpankiti getoga elana, Yehoba nige i gagana elana. Yaa henala ebo ni minaa Keliso wana panpankiti elana, he Yehoba Tamala alona ge Natuna hi gan elana. <sup>10</sup>Ebo gamagal etega ni nowa ge panpankiti ya nige ni pwapwataniwa, bahi nuku babaa mulolu elana o ebo nuku yoyoga pahe wami limiya. <sup>11</sup>Ebo komiu etega ni ba mulolu elana, he iya iyaka i tabwa ana tolabe wana tuwalali nanakina elana.

### **Nuwatu Mowamowasena**

<sup>12</sup>No nuwatu hi gewi iyoho bosowaina na pamasal eliyamiu, yaa nige nuwau pepa ge pen na patuwalali-agil. Ya nuwatu te na nowa na kitemiu, inoke maninila ta pahanalivaso ge ta liwaliwan, inoke alowau komiu yaliyaya ta kalaopopwi.

<sup>13</sup>Talim, Yehoba wana hilihili yovana,<sup>e</sup> natunau hi mulolu eliyam.

---

<sup>d</sup> 7 1Diy 4:1-3    <sup>e</sup> 13 Tabam ekelesiya toto Diyon i miminaa bana.